

**KENYATAAN PENANGGUHAN  
YANG BERHORMAT DATO SERI SETIA AWANG HAJI ALI BIN  
APONG  
MENTERI SUMBER-SUMBER UTAMA DAN PELANCONGAN  
NEGARA BRUNEI DARUSSALAM**

**SEMASA MUSIM PERMESYUARATAN PERTAMA  
MAJLIS MESYUARAT NEGARA KALI KE-13, TAHUN 2017**

**Bismillahir Rahmanir Rahim**

**Alhamdulillah Rabbi 'Aalameen, Wassalatu Wassalamu 'Alaa Sayyidina  
Muhhammadin, Wa 'Alaa Aalihie Wasahbihie Ajma'een.**

**Robbish rohli sodri wayasirli amri wahlul uqdatamilisaani yafqahu qauli.**

**Yang Berhormat Pehin Yang Di-Pertua;**

**Yang Berhormat Menteri-Menteri Kabinet;**

**dan**

**Ahli-Ahli Yang Berhormat Majlis Mesyuarat Negara.**

**Assalamualaikumwarahmatullahi wabarakatuh dan Salam Sejahtera**

**Yang Berhormat Pehin Yang Di-Pertua,**

1. Terlebih dahulu kaola ingin mengucapkan setinggi-tinggi tahniah kepada Yang Berhormat Pehin Yang Di-Pertua di atas kepimpinan dan kebijaksanaan Yang Berhormat Pehin Yang Di-Pertua dalam menguruskan Musim Permesyuaratan Pertama, Majlis Mesyuarat Negara Kali Ke-13 bagi Tahun 2017 ini. Atas kepimpinan dan kebijaksanaan Yang Berhormat Pehin Yang Di-Pertua jua, Permesyuaratan Majlis Mesyuarat Negara Kali Ke-13 bagi Tahun 2017 ini telah berjalan dengan penuh tersusun dan teratur; dalam keadaan dan suasana yang harmoni, penuh keselesaan dan sangat produktif; serta memfokus kepada membincangkan perkara-perkara strategik demi kepentingan kesejahteraan, keamanan, kemajuan dan pembangunan Negara Brunei Darussalam.

2. Seterusnya, kaola juga ingin merakamkan setinggi-tinggi penghargaan dan terima kasih kepada rakan-rakan sejawat dan juga Ahli-Ahli Yang Berhormat Majlis Mesyuarat Negara yang dilantik di atas segala pemikiran-pemikiran yang membina selama tempoh kita sama-sama bermesyuarat dalam Musim Permesyuaratan Pertama Majlis Mesyuarat Negara Kali Ke-13 ini. Pemikiran-pemikiran yang dikongsikan oleh Ahli-Ahli Yang Berhormat Majlis Mesyuarat Negara, tidak dinafikan adalah sangat berguna untuk pihak abis kaola ambil-kira dalam apa-apa jua perancangan dan tindakan, khususnya yang berkaitan dengan pihak Kementerian kaola. Insya Allah sebarang kelemahan yang ada, akan pihak abis kaola perbaiki demi kemajuan Negara jua.

## **Yang Berhormat Pehin Yang Di-Pertua,**

3. Dalam Kenyataan Penangguhan ini, kaola sukacita mengajak semua, Ahli-Ahli Dewan dan termasuk juga rakyat dan penduduk di Negara ini; pihak swasta; pengusaha-pengusaha kecil dan sederhana; dan Dewan-Dewan dan Pertubuhan-Pertubuhan Perniagaan dan Perusahaan, untuk kita sama-sama sentiasa ingat mengingati akan intipati Titah Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah Ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam bersempena Istiadat Pembukaan Rasmi, Mesyuarat Pertama dari Musim Permesyuaratan Ke-13, Majlis Mesyuarat Negara, pada hari Isnin, 7hb. Jamadilakhir 1438 Hijrah bersamaan dengan 6hb. Mac 2017 Masehi yang lalu.

4. Satu isu mustahak yang secara spesifik Baginda telah tekankan ialah berkaitan dengan ekonomi Negara. Dengan penurunan keluaran minyak dan gas, serta kejatuhan harga minyak dunia kebelakangan ini, ianya membawa kesan sangat ketara kepada prestasi dan pertumbuhan ekonomi Negara atau KDNK kita. Oleh kerana itulah, Baginda masih sahaja mengingatkan kita semua untuk terus giat berusaha mempelbagaikan ekonomi negara ini. Struktur ekonomi atau KDNK Negara kita yang sudah sekian lama bergantung kepada hasil minyak dan gas perlu diseimbangkan melalui pertumbuhan keluaran industri ekonomi yang lain, khususnya yang diluar minyak dan gas.

5. Selaras juga dengan titah saranan Kebawah Duli Yang Maha Mulia itu, Kementerian Sumber-Sumber Utama dan Pelancongan akan terus berusaha untuk memastikan adanya pertumbuhan yang pesat ke atas

keluaran sektor pertanian, penternakan, perikanan, dan perhutanan, serta sektor pelancongan. Dalam ucapan muqaddimah kaola ketika berbincang di peringkat Jawatankuasa pada minggu lepas, kaola telah mengongsikan sasaran-sasaran Kementerian kaola, iaitu untuk meningkatkan sumbangan sektor pertanian, perikanan dan perhutanan, dari 1% KDNK pada tahun 2015, kepada 4% ke 5% KDNK menjelang tahun 2020. Kaola juga mengongsikan berkenaan usaha-usaha Kementerian kaola untuk mengurangkan pergantungan kepada perbelanjaan Kerajaan bagi merealisasikan sasaran-sasaran berkenaan, contohnya melalui kaedah Perkongsian Awam dan Swasta (PPP).

6. Selanjutnya kaola juga sempat mengongsikan beberapa kejayaan Kementerian kaola menawarkan kawasan kemajuan pertanian dan kawasan perikanan kepada pelabur-pelabur tempatan dan pelabur asing untuk mengusahakan aktiviti-aktiviti pertanian dan perikanan, terutama dengan menggunakan teknologi moden dan mensasarkan kepada pasaran export.

7. Dalam ucapan muqaddimah kaola itu, kaola memang sengahaja memfokus kepada aktiviti pertanian dan perikanan berteknologi tinggi kerana Kementerian kaola penuh berkeyakinan bahawa kedua sektor ini akan dapat membantu memacu pertumbuhan KDNK kita secara *significant* dalam beberapa tahun akan datang. Dengan demikian, diharap sektor ini juga akan dapat menjana lebih banyak peluang pekerjaan, terutama di dalam keadaan di mana negara masih menghadapi kadar pengangguran yang agak tinggi ketika ini.

8. Menyentuh mengenai sektor pelancongan, yang mana juga merupakan satu topik yang diminati oleh kebanyakan Ahli-Ahli Yang Berhormat Majlis Mesyuarat Negara, sebenarnya pihak kaola memang sering menerima banyak cadangan dari berbagai pihak supaya Mukim dan Kampong di bawah jagaan masing-masing dimajukan sebagai destinasi pelancongan, contohnya Ayer Panas di Mukim Sukang, Wasai-Wasai Kampong Labi, Kawasan Kg Kuala Balai, Taman Riadah Anduki dan lain-lain. Sebagai makluman, Kementerian kaola memang sudah lama mengenali tempat-tempat berkenaan mempunyai ciri-ciri yang boleh diketengahkan sebagai destinasi pelancongan, akan tetapi setelah menilai dari segi keutamaan; dari segi kesesuaian untuk *mepackage* dengan produk-produk disekitarnya; dari segi perbelanjaan Kerajaan yang dilibatkan; dan dari segi saiz hutan-hutan yang terpaksa disiangi, maka beberapa tempat tertentu sahaja dimajukan terlebih dahulu, iaitu terutama tempat-tempat di mana kemajuannya telah dimulakan, sama ada oleh pihak Kerajaan atau oleh komuniti-komuniti di kawasan berkenaan.

9. Di Dewan Majlis yang mulia ini, kaola sukacita mencadangkan agar Majlis-Majlis Perundingan Mukim dan Kampong yang berminat untuk mukim dan kampong mereka dimajukan sebagai destinasi pelancongan supaya menimba pengalaman dari kejayaan yang telah dicapai oleh beberapa Majlis-Majlis Perundingan Mukim dan Kampong di seluruh negara, yang mana kebanyakannya telah berjaya tanpa bergantung kepada perbelanjaan Kerajaan, akan tetapi melalui kerjasama dan kegigihan komuniti Mukim dan Kampong masing-masing, contohnya MPK Sungai Matan; MPK Sungai Bunga; MPK Kapok; MPK Katimahar; MPK Belimbing; MPK Masjid Lama, Sabun, Pelumpong dan Pekan Muara; MPK Lurong Sikuna; MPK Kiudang; MPK Tanjung Maya; MPK Lamunin; MPK Belais dan Buda-Buda; MPK Sumbiling Baru dan lain-lain. Di kesempatan ini, kaola

mengucapkan tahniah dan syabas kepada Majlis-Majlis Perundingan Mukim dan Kampong berkenaan, dan pihak Kementerian Sumber-Sumber Utama dan Pelancongan akan berusaha untuk memasukkan destinasi dan produk-produk serta aktiviti-aktiviti Majlis Perundingan Mukim dan Kampong berkenaan ke dalam pakej-pakej produk pelancongan yang bersesuaian, iaitu dengan mengambil kira produk-produk atau aktiviti-aktiviti pelancongan di kawasan sekitar yang berhampiran.

10. Sambil kita cuba membantu Mukim dan Kampong yang gigih memajukan Mukim dan Kampong masing-masing, Kementerian tidak boleh mengabaikan destinasi-destinasi utama yang sedia ada ketika ini seperti destinasi Bandar Seri Begawan dan Kg Ayer, dan destinasi Daerah Temburong. Kualiti destinasi-destinasi ini perlu sentiasa dijaga, dipelihara, dan dikukuhkan supaya pengunjung-pengunjung tidak jemu-jemu mengunjunginya. Sebagai contoh, destinasi Daerah Temburong, masih banyak kekurangan dari segi kemudahan tempat tinggal yang berkualiti tinggi bagi sebahagian *segment* pasaran. Begitu juga tahap keselamatan kemudahan-kemudahan riadah dan aktiviti lasak di Batang Duri dan di Taman Ulu-Ulu, adalah perlu dipantau setiap masa bagi memastikan keselesaan dan keselamatan pengunjung ke tempat-tempat berkenaan. Kementerian juga berusaha untuk mengembangkan beberapa destinasi baru yang difikirkan mempunyai potensi besar untuk dijadikan calon bagi pakej pelancongan seperti pantai-pantai dan taman-taman rekreasi perhutanan yang sudah dibangunkan. Untuk memastikan kejayaannya dan bagi mengurangkan beban Kerajaan, pihak Kementerian akan terus berusaha untuk menswastakan pengurusan kemudahan awam di taman-taman berkenaan, yang mana kejayaan penswataan ini adalah tertakluk kepada wujudnya potensi untuk menjana keuntungan kepada pelabur-pelabur berkenaan.

**Yang Berhormat Pehin Yang Di-Pertua,**

11. Sekianlah sahaja yang dapat kaola sampaikan sebagai Kenyataan Penangguhan kaola pada Musim Permesyuaratan Pertama, Majlis Mesyuarat Negara Kali Ke-13, Tahun 2017 ini. Sebelum mengundur diri, kaola dengan penuh hormat dan takzim sukacita momohon maaf kepada Yang Berhormat Pehin Yang Di-Pertua dan juga kepada kesemua Ahli-Ahli Yang Berhormat Majlis Mesyuarat Negara, terutama jika ada yang tidak sesuai dalam tingkah laku dan tutur kata kaola ketika berhujjah di dalam Dewan yang mulia ini di sepanjang sesi mesyuarat kali ini, sama ada di peringkat Majlis Mesyuarat Negara atau di peringkat Jawatankuasa.

**Sekian, Wabillahittaufik Walhidayah. Wassalamualaikum Warahmatullahi Wabarakatuh.**